

GOBERNADOR TROMP A HABRI AÑA PARLAMENTARIO

Pa ultimo biaha como gobernador di Aruba

ORANJESTAD(AAN): Ayera, pa ultimo biaha como Gobernador di Aruba, Sr. Felipe Tromp, a habri un aña parlamentario nobo.

Esaki debi na e hecho cu fin di e aña su periodo como Gobernador ta termina, y manera president di Parlamento Sr. Feliz Flanegin a bisa, esaki sin embargo lo no ta e ultimo biaha cu lo mira Sr. Tromp den Parlamento ya cu e despedida oficial no a tuma lugar.

Gobernador Tromp a splica ayera mainta na inicio di su discurso cu na comienzo di e aña parlamentario aki ta toca su persona como Gobernador di Aruba e honor di trece publicamente den parlamento e plannan di gobierno pa e aña parlamentario 1991-1992.

"Despues di seis aña cumpliendo cu e tarea mi ta participa Parlamento cu esaki lo ta ultimo biaha cu mi ta

duna tal declaracion ya cu e termino pa cual mi a ser nombra como Gobernador di Aruba ta termina entrante prome di Januari proximo.

"Mi ta gradici parlamento pa e forma sano y positivo cu nos a traha cu otro na bienestar di nos dushi Aruba", el a laga sa.

Segun Gobernador Tromp, durante e seis añanan e por bisa cu placer cu el a mira Aruba desarolla y duna contenido na su posicion special den reino hulandes y cu e ta sinti su persona honra di a forma parti y di por a duna su contribucion na esaki.

"Durante e añanan cu a transcuri, Aruba a conoce un desarrollo positivo y mirando atras riba con nos a pone e prome pasonan den nos Status Aparte, y compara esaki cu unda nos ta awe, nos por bisa cu conviccion cu nos por ta hopi satisfecho", el a expresa.

ORANJESTAD(AAN):----
Durante e aña parlamentario cu a pasa a mira desarrollonan internacional manera e crisis den Golfo, e desarrollo di democratizacion den e paisnan comunista cu casi a yega na un final abrupto ora cu forzanan reaccionario a haci intento pa para tal proceso y pone mundo den suspenso 72 ora.

Atrobe un pueblo cu ta kere den un democracia bibo a sali na defensa di su derechonan y a demostra cu un pueblo uni no por ser derrota; e mes un union cu nos pueblo a demostra pa realiza su Status Aparte, segun Gobernador Tromp ayera mainta entre otro den Parlamento.

Den su discurso na apertura di aña parlamentario nobo, el a mustra cu riba tereno nacional gobierno a sigui cu ehecurion di su programa di gobernacion, manteniendo ser humano central den su maneho. Den ehecurion di tal programa a tene consulta debido cu Parlamento y cu gremionan den comunidad, manera sindicatonan, sector comercial y industrial y otronan concerni.

"Lamentablemente nos

PRESUPUESTO 1991 TAMBE CU SURPLUS

Gobernador a resalta trabao di difunto Guillermo Trinidad

mester a tuma despedida di Sr. Guillermo Trinidad na bida ministro di finanzas. Su dedicacion na su trabao y su estatura como politico lo keda un ehemplo pa nos tur", Gobernador Tromp a bisa entre otro.

El a splica cu riba tereno gubernamental servicionan di gobierno a ser optimaliza y ta den un proceso di automatizacion completo pa cumpli cu necesidadnan di pueblo, en particular mirando e crecimiento di poblacion y e actividad economico di cualnan ta resalta reapertura oficial di e refineria na april ultimo, construccion y apertura di hotelnan, ampliacion di zona liber y establecimientonan comercial cu ta dunando un base mas hancho na nos economia.

E esfuerzonan di gobierno pa elimina e asina yama "off season" den turismo a duna resultadonan hopi positivo, garantizando asina mas y mas cuponan di trabao permanente den tal industria.

"Apesar di e hecho cu durante aña 1990 pa 1991 nos cantidad di cambenan a subi substancialmente, Aruba a sa

di mantene su porcentahe di ocupacion riba un nivel economico rendable.

"Manera cu gobierno a pone den su programa di gobernacion y gracias na maneho balanza di nos ministro cu a bay laga nos, awe en feliz memoria Sr. Guillermo Trinidad, nos a logra elimina deficit den nos presupuesto y pa e aña presupuestario 1991 a crea un surplus di 20 millon florin", Gobernador Tromp a resalta.

El a bisa cu gobierno a caba di entrega su presupuesto pa aña 1992 na Parlamento y esaki tambe ta mustra un surplus di mas di 20 millon florin dunando asina realce na un maneho responsabel pa cu fondonan publico: maneho cu a ser elogia pa nos Banco Central den su rapport cu ta cubri aña 1990 y tambe pa e Fondo Monetario Internacional den su ultimo rapport.

**Y abo a busca bo
glas di KLIM caba?
Nan ta gratis ku
kompra di lechi KLIM**